




Տ. Տ. ՎԱԶԳԵՆ Ա. ՎԵՀԱՓԱՌ ՀԱՅՐԱՊԵՏԻ ԽՈՍՔԸ
ԵՐԵՎԱՆԻ ՀԵՌՈՒՍՏԱՑՈՒՅՑԻՑ

Սիրեցյալ ժողովուրդ Մեր,

Այս խոռվահույզ ժամանակներում, երբ մեր ազգը մարտնչում է իր արդար իղձերի իրականացման համար, երբ մեր ինքնիշխան հայրենի պետության անձնվեր երիտասարդ ղեկավարները հերոսական ճիգեր են ի գործ դնում հասնելու համար ազատության և անկախության գործընթացի վերջնական հաղթանակին, մեր Մայր Եկեղեցին՝ Հայ Առաքելական Եկեղեցին ևս, ոգեշնչված նույն այդ իդեալներով, կամենում է իր նպաստը, իր աշխատանքի բաժինը բերել ի կենսագործումն մեր ազատատենչ ժողովրդի ազնիվ սպասումների:

Այս զգացումներով, այս խոհերով տոգորված, Մենք ողջունում ենք Հայաստանի հեղուստատեսության ղեկավարության որոշումը, այս ամսից սկսած առավել լայն տեղ տալու «Խորան Լուսոյ» կրոնական հաղորդաշարին, ի մխիթարություն մեր հավատավոր ժողովրդի գավակների:

Ընդառաջելով հեղուստատեսության ղեկավարության այս գովելի առաջադրանքին, Մենք որոշեցինք «Խորան Լուսոյ» հաղորդումների ծրագիրը ընդլայնել նոր միջոցառումներով և գործակիցներով, Սյունյաց թեմի առաջնորդ Գերաշնորհ Տ. Ասողիկ եպիսկոպոս Արիստակեսյանի ղեկավարության ներքո:

Այսօր Մենք հաճելի պարտականությունը ունենք Մեր օրհնությամբ բացումը կատարելու «Խորան Լուսոյ» հաղորդումների այս նոր շրջանի:

Ամենայն Հայոց Սուրբ Էջմիածնից շողարձակվող «Խորան Լուսոյ» հաղորդումները մեր ժողովրդին մշտապես պիտի բաշխեն Աստուծո խոսքը, Քրիստոսի Ավետարանի կենարար պատգամները և Սուրբ Հոգու շնորհները, ի շինություն նրա հոգևոր ու բարոյական կյանքի: Զի Մենք, ինչպես դարեր շարունակ մեր լուսաբնակ նախնիները, հավատում ենք երկնի ու երկրի արարիչ Աստծուն, նրա Միածին Որդու փրկչագործ Ավետարանին ու Սուրբ Հոգու շնորհաբաշխ գործությանը:

Սույն կրոնական հաղորդումներով մեր Եկեղեցու սպասավորները իրենց բարոգության մեջ պիտի ընդգրկեն նաև նյութեր Հայ Առաքելական Եկեղեցու պատմության, դավանության և մատենագրության վերաբերյալ,

ինչպես և լայն տեղեկություններ մեր Եկեղեցու՝ մեր օրերում ծավալող գործունեության մասին Հայաստանում և սփյուռքում:

«Խորան Լուսոյ»-ից, մեր հոգևորականները՝ եպիսկոպոսներ, վարդապետներ և քահանա հայրեր, իրենց կենդանի խոսքով պիտի ջանան մանավանդ նպաստել մեր ժողովրդի հոգևոր բարոյական կատարելագործմանը, հայրական թելադրանքներով, որ նրանք սուրբ հավատքի գործությամբ ու ազնիվ ներշնչանքներով հեռու մնան մեղանշումներից, մոլություններից և վատառողջ հակումներից, թե իրենց ընտանեկան հարկի տակ, թե իրենց աշխատանքի վայրում, թե իրենց հասարակական կյանքում:

Իսկապես, մեր ժողովուրդը ազգային զարթոնքի հետ զուգահեռ, կարիք ունի նաև բարոյական նկարագրի զարթոնքի: Զի մարդ անհատի հոգու գերագույն զարդը, գերագույն պարծանքը՝ բարոյական գիտակցության հրամայականն է, որով իր հոգուց արմատախիլ պետք է անի անցյալից մնացած արատները, եսակենտրոն մղումները, ինչպիսիք են՝ շահամոլությունը, ընչաքաղցությունը, կաշառակերությունը, այլ և այլ գեղձարարություններն ու մոլությունները:

Դուք, արմենական ցեղի հպարտ գավակներ, լավ իմացեք, որ մեր Առաքելական սուրբ Եկեղեցին իր քարոզչությամբ և խորհրդակատարություններով մի տևական «անլռելի զանգակատուն» է, որ հրավեր է կարդում մեր ազգի բոլոր գավակներին ապրել ու գործել բարեսրտությամբ, շինարար աշխատանքով ու առաքինի արարումներով, իր ազգակիցների հետ եղբայրական սիրո միության մեջ: Հայ Եկեղեցին միարար ու խաղաղարար մի համազգային սիրո եղբայրակցություն է:

Մեր եկեղեցիների բեմերից, սուրբ պատարագի ժամին, ամեն կիրակի քաղցրաձայն հնչում է մեր աննման «Տէր ողորմեա»-ն, վերջում այս աղոթքով՝ «Տէր ողորմեա, Տէր ողորմեա, տուր աշխարհիս խաղաղութիւն, ազգիս հայոց սէր, միութիւն»:

Սիրելիներ Մեր, մեր օրերում, երբ այնքան ոգևորությամբ ու ուժգնությամբ բարձրադադակ խոսվում է ազատության և արդարության գաղափարների մասին, կամենում ենք ձեզ հիշեցնել, թե այդ մարդասիրական վեհ գաղափարների հիմքերը գտնվում են Քրիստոսի սուրբ Ավետարանում: Դրա համար է, որ Փրկիչը մեր Հիսուս կոչվում է «Արեգակ արդարութեան ու ազատութեան» և «Իշխան խաղաղութեան»:

Արդարություն, ազատություն ու խաղաղություն, ահա ոգեղեն սյուները քրիստոնեական ավետարանչության, քրիստոնեական բարոյականի:

Քրիստոնեական առաքելության հիմնական նպատակը մարդու փրկությունն է չարի ու մահվան կապանքներից:

Քրիստոնեությունը, այսպիսով, մարդակենտրոն կրոն է, որովհետև քրիստոսակենտրոն է, զի Հիսուս հավասարապես Աստված էր և Մարդ: Քրիստոս իր մարդեղությամբ և խաչափայտի վրա իր զոհաբերումով է, որ դարձավ Փրկիչ ազգի մարդկան: Քրիստոսով է, որ մարդը կոչվեց դառնալ պայծառակերպ բարոյական էակ:

Կարող ենք նույնիսկ մտածել, թե առանց՝ Քրիստոսով մարդու բարոյական պայծառակերպման, Աստված կզրկվեր իր գոյության բարոյական իմաստից:

Մարդասերն Աստված իր Միածին Որդուն աշխարհ առաքեց, իր

արարչագործության բարոյական գերագույն նպատակը իրականացնելու համար մարդկային հոգեկան աշխարհում:

Ինչքան մխիթարական է Մեզ համար, Հայոց Հայրապետի համար, որ մեր ժողովուրդը այսօր ի Հայաստան և ի սփյուռս աշխարհի, իր երեսը դարձրել է դեպի աղոթարան և ողջունում է ծագումը արդարության ու ազատության արեգակի հայրենի աշխարհի վրա և վերանորոգում իր նախնյաց սրբազան ուխտը՝ Քրիստոսի Ավետարանի լույսով դառնալու նոր մարդ, նոր ժողովուրդ, ազատագրված ժողովուրդ:

Ցանկանում ենք նաև հիշեցնել, որ ամեն մեկի մտածելու ու գործելու ազատությունը պայմանավորված է իր նմանների, իր ազգակից եղբայրների մտածելու ու գործելու ազատությամբ:

Իրապես ազատ ու արդար է այն մարդը, որը հարգում է ազատությունն ու արդար գործը իր եղբայրների:

Սույն մի քանի տողերով, Մենք վերջացնում ենք Մեր խոսքը և մաղթում, որ «Խորան Լուսոյ» հաղորդումը Քրիստոսի լույսով պայծառացնի մեր ժողովրդի միտքն ու հոգին, մեր ժողովրդի բարոյական նկարագիրը, մեր ժողովրդի ձեռաց գործերը:

«Լուսովդ քո Քրիստոս, ամենեքեան լուսաւորեցաք և ի սուրբ խաչ քո փրկիչ հաւատացեալքս ապաւինեցաք»:

«Էմանուել, Էմանուել, այո, հավատանք, թե Աստված ընդ մեզ է»:

Ամեն:

